

Nuna tamakkerlugu ikiaroorntoq hash-ip akiorniarneqarnissaa pillugu iliuusissamik pilersaarummik UKA 2016-imi Naalakkersuisut saqqummiussaqaqqullugit Inatsisartut aalajangiiffigisassaattut siunnersuut

(Inatsisartuni ilaasortaq Mimi Karlsen, Inuit Ataqatigiit)

Akissuteqaat

(Peqqissutsimut Naalakkersuisoq, Doris Jakobsen)

Aappassaaneerpeqarnera

Naalakkersuisut Ilaqutariinnermut Peqqissutsimullu Ataatsimiititaliaq siunnersuutip matuma suliarilluarsimaneranut qujavugut.

Ataatsimiititaliaq ”Nuna tamakkerlugu ikiaroorntoq hash-ip akiorniarneqarnissaa pillugu iliuusissamik pilersaarummik UKA 2016-imi Naalakkersuisut saqqummiussaqaqqullugit Inatsisartut aalajangiiffigisassaattut siunnersuut” allannguutissatut siunnersuummik nassiussipput. Ataatsimiititaliap allannguutissatut siunnersuut atortussanngortillugu siunnersuullu siulleq itigartitsissutigineqarnissaanut siunnersuutaat Naalakkersuisut tusaatissatut tiguaat. Hashi pillugu suliniut aallarnisarneqareermat Naalakkersuisut ataatsimiititaliap allannguutissatut siunnersuutaat tapersersuinnarsinnaavaat.

Naalakkersuisut isumaqataapput hashi nunatsinni ajornartorsiutaasoq ajornartorsiullu pimoorunneqarpoq. Oqaatigineqareersutut hashi pillugu suliniut ilusilersorneqalereerpoq. Imigassaq pillugu pilersaarut 2013-2019–mut pilersaarutip matuma ikorfartussavaa aammalu peqqinnissamat suliniutini ataatsimoorussani Inuuneritta II-miittuni hashi aamma imigassaq qitiusumik sammineqarput. Naalakkersuisut nuna tamakkerlugu hashi pillugu iliuusissamik pilersaarummik 2016-mi upernaakkut ataatsimiinnermi saqqummiussinissartik aalajangiusimavaat. Isumaliutissiissummi kissaatigineqareersutut Naalakkersuisut partiit oqaloqatigiinnissamat isumaqatiginninniarnissamullu suliniutinut suliniarnernullu qaaqqujumaarpat.

Taamatut oqaasertalerlugu ataatsimiititaliap allannguutissatut siunnersuutaat Inatsisartunit akuerisassatut Naalakkersuisut innersuutigat.